

Vooraf:

- Reël verversings vir die groep.
- Deel die teks vooraf met die groep. 'n Ander vertaling of twee sal help om die teks meer volledig te hoor.

Tafelmaniere

Die doel van hierdie tafelmaniere is om ruimte te skep waar ons God kan hoor en voorkom dat een persoon die gesprek oorheers.

Herinner mekaar aan julle groep se tafelmaniere wat julle saam geskryf het.



Verwelkoming:

- Verwelkom almal.
- Is daar iemand nuut in die groep?
- Oorweeg dit om 'n kers aan te steek om julle groep te herinner aan God se volledige teenwoordigheid deur die Heilige Gees.

Bid saam:

Neem 'n paar oomblikke. Raak stil en rustig. Haal diep asem. Laat iemand die volgende gebed lees:

Here, watter mens mag voor U kom staan?

Wie mag in u huis instap, daar waar U spesiaal teenwoordig is?

Mense wat so optree dat U heeltewel tevrede is met wat hulle doen, mag daar kom;

ja, almal wat reg doen, wat U wil hê.

Mense wat altyd die waarheid praat.

Mense wat nie skinder nie en nie sleg praat oor ander nie, of vriende in die rug steek nie.

Dis mense wat nie dinge sê wat ander seermaak nie.

Dis mense wat hul woord hou, al kos dit hulle soms duur.

Amen. (Verwerk uit Psalm 15:1-4, Die Boodskap)

Gesels:

Ysbreker gesprek.

- Vertel mekaar van 'n toespraak wat jy al gehoor het en jou getref het.
- Kyk Ashton Kutcher se speech saam – wat tref jou daarvan?
<https://www.youtube.com/watch?v=FNXwKGZHmDc>

Teks:

Laat iemand die teks een maal hardop lees.

TEKS: MATTEUS 5:1-12 (DIE BOODSKAP)

¹Toe Jesus die groot skare mense bymekaar sien, het Hy teen die berg uitgeklim. Toe Hy gaan sit, kom sy dissipels na Hom toe.

²Hy het begin om hulle soos volg te onderrig:

³“Gelukkig is dié mense wat weet hoe nodig hulle God het, want die koninkryk van die hemele is hulle deel.

⁴Gelukkig is die treuendes, want God sal self hulle tranes afvee.

⁵Gelukkig is dié wat sag van hart is, want die nuwe aarde sal hulle erfporse wees.

⁶Gelukkig is dié wat honger en dors na wat voor God reg is, want Hy sal hulle hartsverlange bevredig.

⁷Gelukkig is dié wat met ontferming uitreik na mense in nood, want God sal Hom oor hulle ontferm.

⁸Gelukkig is dié wie se harte volkome op God gerig is, want hulle sal vir God sien.

⁹Gelukkig is die vredemakers, want God sal vir hulle sê: ‘Julle is my kinders.’

¹⁰Gelukkig is dié wat vervolgd word ter wille van wat voor God reg is, want die koninkryk van die hemele is hulle deel.

¹¹“Gelukkig is julle wanneer julle bespot en vervolgd word en allerhande leuens oor julle versprei word omdat julle my dissipels is. ¹²Wees bly, ja, jubel daaroor, want God sal julle ryklik daarvoor beloon. Onthou, so het hulle die profete voor julle ook vervolgd.”

Laat elkeen die teks 'n tweede maal self deurlees en wag dat iets vir hul uitstaan.

Gesels in die groep oor die volgende:

- Gesels 2-2/ 3-3 oor wat julle nie verstaan nie of wat vir hulle vreemd is. (As die tieners nie vir mekaar kan help om meer duidelikheid te kry nie, kan hulle in die groep vra wat hulle nie verstaan nie.)
- In Matteus 5 is Jesus besig om met 'n klomp mense te gesels, en Hy vertel vir hulle iets groots – hoe die Koninkryk van God werk.
 - Onthou dat die Jode het op daardie tyd na 'n sterk leier verlang wat hulle sou kom vrymaak van die Romeinse regering af – die Romeine het afgode aanbid; het baie belasting van mense geëis en het mense met baie geweld beheer.
 - Die mense van Galilea was "laer-klas" Jode, want dit was 'n armer gebied en hulle was nie meer "suiwer" Jode soos die wat in Jerusalem, naby die tempel gewoon het nie.
 - Jesus kom vertel wel vir hulle iets anders – dat Sy manier van dinge doen anders is, eintlik omgekeerd is van wat die wêreld dink magtig, goed en reg is.
 - As jy na Jesus se toespraak geluister het, sou dit vir jou 'n inspirerende boodskap of 'n teleurstelling wees?
- Wat dink julle wou Jesus hê moes die mense daar teen die berg hoor?
- Hoe laat die volgende idees oor "geluk" uit die teks jou voel? Jy is gelukkig wanneer jy:
 - Niks anders kan doen as op God staatmaak nie
 - hartseer is
 - 'n sagte hart het
 - Honger en dors na wat reg is
 - Uitreik na ander
 - Soek na wie God is
 - Vrede maak
 - Gespot word oor jy vir Jesus volg
- Skryf hierdie lysie oor in julle eie woorde vir julle eie wêreld.
- Hoe is dit anders as die wêreld waarin jy leef?
- **Wat sê die teksgedeelte vir jou? Wat het vir jou uitgestaan? Wat is die boodskap wat Jesus vandag vir jou wil gee?**

Bid vir mekaar oor wat die teks vir julle sê, asook vir wat alles vir julle voorlê vir die res van die week.

Voor julle uitmekaargaan, maak onder mekaar seker oor die volgende:

- Is almal op die kommunikasie-lys?
- By wie kom die groep volgende week bymekaar?